

全華叢書



全華策書



西漢年紀卷二十四

宋王益之撰

郡後學胡鳳丹月樵校梓

成帝

孝成皇帝諱驚元帝太子也年三歲宣帝崩而元帝
卽位爲太子壯好經書寬博謹慎竟寧元年五月元
帝崩六月己未太子卽皇帝位謁高廟尊皇太后曰
太皇太后皇后曰皇太后本紀以元舅侍中衛尉陽平
侯王鳳爲大司馬大將軍領尙書事本紀益封五千戶
王氏之興自鳳始元后傳初許嘉自元帝時爲大司馬

車騎將軍輔政已八九年矣及帝立復以鳳與嘉竝
杜欽以爲故事后父重於帝舅乃說鳳曰車騎將軍
至貴將軍宜尊之敬之無失其意蓋輕細微渺之漸
必生乖忤之患不可不慎衛將軍之日盛於蓋侯近
世之事語尙在於長老之耳唯將軍察焉許皇后傳擢駙
馬都尉侍中史丹爲長樂衛尉丹傳有司奏大鴻臚馮
野王王舅不宜備位九卿以秩出爲上郡太守諸曹
馮立出爲五原屬國都尉黃門郎給事中馮參出補
涇陵食官令立參野王弟也馮奉世傳遷中書令石顯爲

長信中太僕秩中二千石

石顯傳

大將軍王鳳以外戚

輔政求賢知自助奏請杜欽爲大將軍武庫令故東

平相涿郡王尊補軍中司馬擢司隸校尉以陳咸前

指言石顯有忠直節奏請補長史咸薦御史蕭育杜

陵朱博除幕府屬鳳甚奇之鳳素重欽國家政謀常

與欽慮之數稱達名士俾正闕失當世善政多出於

欽

杜欽陳萬年朱博王尊蕭望之傳通鑑

大將軍聞宛

於元反

句

音劬

令東

海薛宣之能薦宣爲長安令治果有名以明習文法

詔補御史中丞是時帝初卽位宣爲中丞執法殿中

外總部刺史

宣傳

徵故左中郎將王章爲諫大夫

章傳谷

口鄭子真修身自保非其服弗服非其食弗食大將

軍鳳以禮聘子真子真遂不詘而終

王貢傳序

秋七月大

赦天下

本紀

考異曰荀紀作冬十有一月按此赦爲元帝葬而下也元帝以六月葬不應至十

一月始赦也荀紀誤今從漢書本紀

丞相匡衡上疏曰臣聞六經者聖

人所以統天地之心著善惡之歸明吉凶之分通人

道之正使不悖于其本性者也故審六藝之指則天

人之理可得而和草木昆蟲可得而育此永永不易

之道也及論語孝經聖人言行之要宜究其意孔子

曰德義可尊容止可觀進退可度以臨其民是以其
民畏而愛之則而象之大雅云敬慎威儀惟民之則
諸侯正月朝覲天子天子惟道德昭穆穆以視之又
觀以禮樂饗醴乃歸故萬國莫不獲賜祉福蒙化而
成俗今正月初幸路寢臨朝賀置酒以饗萬方傳曰
君子慎始願陛下留神動靜之節使羣下得望盛德
休光以立基楨天下幸甚上敬納其言匡衡丞相匡
衡奏射聲校尉陳湯前以吏二千石奉使顓命蠻夷
中不正身以先下而盜所收康居財物戒官屬曰絕

域事不覆校雖在赦前不宜處位湯坐免

湯傳

建始元年司隸校尉王尊劾奏衡譚位三公典五常
九德以總方略壹統類廣教化美風俗爲職知中書
謁者令顯專權擅勢大作威福縱恣不制無所畏忌
爲海內患害不以時白奏行罰而阿諛曲從附下罔
上懷邪迷國無大臣輔政之義皆不道在赦令前赦
後衡譚舉奏顯不自陳不忠之罪而反揚著先帝任
用傾覆之徒妄言百官畏之基於主上卑君尊臣非
所宜稱失大臣體又正月行幸曲臺臨饗罷衛士

如

曰諸衛士吏盡得代去故天子自臨而饗之

衛與中二千石大鴻臚賞等

會坐殿門下衡南鄉賞等西鄉衡更爲賞布東鄉席

起立延賞坐私語如食頃衡知行臨百官共讀曰職

萬眾會聚而設不正之席使下坐上相比頻寐爲小

惠於公門之下動不中禮亂朝廷爵秩之位衡又使

官大奴入殿中問行起居還言漏上十四刻行臨到

衡安坐不變色改容無怵惕肅敬之心驕慢不謹皆

不敬有詔勿劾衡慚懼上疏謝罪因稱病乞骸骨上

丞相樂安侯印綬天子新卽位重傷大臣乃下御史

丞問狀報衡曰君以道德修明位在三公先帝委政
遂及朕躬君遵修法度勤勞公家朕嘉與君同心合
意庶幾有成今司隸校尉尊妄詆欺加非於君朕甚
憫焉方下有司問狀君何疑而上書歸侯乞骸骨是
章朕之未燭也傳不云乎禮義不愆何恤人之言君
其察焉專精神近醫藥強食自愛因賜上尊酒養牛
衡起視事御史丞劾奏尊妄欺詆非謗赦前事猥歷
奏大臣無正法飾成小過以塗汙宰相摧辱公卿輕
薄國家奉使不敬有詔左遷尊爲高陵令然羣下多

是尊者衡嘿嘿不自安每有水旱風雨不時連乞骸

骨讓位上輒以詔書慰撫不許

匡衡王尊石顯傳

石顯等伏

辜劉更生乃復進用更名向向以故九卿召拜爲中

郎使領護三輔都水數奏封事遷光祿大夫

劉向淮

陽欽上書自陳舅張博時事頗爲石顯等所侵因爲

博家屬徙者求還丞相御史復劾欽前與博相遺私

書指意非諸侯王所宜蒙恩勿治事在赦前不悔過

而復稱引自以爲直失藩臣體不敬上加恩許王還

徙者

淮陽王傳

博士鄭寬中東平內史張禹皆以師賜爵

關內侯寬中食邑八百戶禹六百戶

張禹傳儒林傳

時上方

鄉學寬中禹朝夕入說尚書論語於金華殿中大將

軍鳳薦長安班伯宜勸學召見晏昵殿誦說有法詔

從寬中禹受焉拜中常侍數年金華之業絕出敘王

子

侯表

封舅諸吏光祿大夫關內侯王崇爲安成侯食

邑萬戶賜舅王譚商立根逢時爵關內侯食邑三千

戶禁有八男唯曼蚤卒鳳崇與太后同母

本紀元后傳

夏

四月辛丑夜西北有如火光壬寅晨大風從西北起

雲氣赤黃四塞天下終日夜下著地者黃土塵也

五行

志博問公卿大夫無有所諱本諫大夫楊興博士駟

勝等對皆以爲陰盛侵陽之氣也高祖之約也非功

臣不侯今太后諸弟皆以無功爲侯非高祖之約外

戚未曾有也故天爲見異言事者多以爲然大將軍

鳳懼上書辭謝曰陛下卽位思慕諒闇故詔臣鳳與

領尙書事上無以明聖德下無以益政治今有弟與

同星天地赤黃之異咎在臣鳳當伏顯戮以謝天下

今諒闇已畢大義皆舉宜躬親萬幾以承天心因乞

骸骨辭職上報曰朕承先帝聖緒涉道未深不明事

情是以陰陽錯謬日月無光赤黃之氣充塞天下咎
在朕躬今大將軍迺引過自予欲上尙書事歸大將
軍印綬罷大司馬官是明朕之不德也朕委將軍以
事誠欲庶幾有成顯祖宗之功德將軍其專心固意
輔朕之不逮母有所疑

元后傳

御史中丞薛宣上疏曰

陛下至德仁厚哀閔元元躬有日仄之勞而無佚豫
之樂允執聖道刑罰惟中然而嘉氣尙凝陰陽不和
是臣下未稱而聖化獨有不洽者也臣愚不知治道
唯明主察焉上嘉納之宣數言政事便宜舉奏部刺

史郡國二千石所貶通稱進白黑分明繇是知名宣傳

通鑑秋少府召信臣奏罷上林宮館希御幸者二十五

所又奏省樂府黃門倡優諸戲及宮館兵弩什器減

過大半又奏冬生菜強加溫火非時而生有傷於人

不宜以奉供養及它非法食物悉奏罷省費歲數千

萬本紀荀紀八月戊午晨漏未盡三更五行志有兩月

相承見東方本紀九月戊子有流星大如瓠出於文昌

宮光燭地長四五丈委曲蛇形以貫紫薇宮荀紀本紀天文

志冬十二月丞相衡御史大夫譚奏言帝王之事莫

大乎承天之序承天之序莫重乎郊祀故聖王盡心
極慮以建其制祭天於南郊就陽之義也瘞地於北
郊卽陰之象也天之於天子也因其所都而各饗焉
往者孝武皇帝居甘泉宮卽于雲陽立泰畤祭于宮
南今行常幸長安郊見皇天反北之泰陰祠后土反
東之少陽事與古制殊又至雲陽行谿谷中阨陜且
百里汾陰則渡大川有風波舟楫之危皆非聖主所
宜數乘郡縣治道共張吏民困苦百官煩費勞所保
之民行危險之地難以奉神靈而祈福祐殊未合于

承天子民之意昔者周文武郊於豐鄠成王郊於洛
邑由是觀之天隨王者所居而饗之可見也甘泉泰
畤河東后土之祠宜可徙置長安合于古帝王願與
羣臣議定奏可大司馬車騎將軍許嘉等八人以爲
所從來久遠宜如故右將軍王商博士瑯邪師丹議
郎汝南翟方進等五十人以爲禮記曰燔柴于太壇
祭天也瘞薶于太折祭地也兆于南郊所以定天位
也祭地于太折在北郊就陰位也郊處各在聖王所
都之南北書曰越三日丁巳用牲於郊牛二周公加